

Wat e Wouscht !

D'FIFA an hir onverschimmt Korruptiounsskandalen...

Déi sougenannte Footballweltmeesterschaften, déi mir zënter iwwer engem halwe Jorhonnert, all véier Joer, mat Begeeschterung suivéiert hunn, verdéngen déi an Zukunft nach hiren Numm ? Oder missten se net ëmgedeft ginn ? Zum Beispill an e vill méi realistesch Begrëff wéi :

« WM vun de knaschtege Profiteuren, vun de geriwwene Gauner, vun de rücksichtslose Gangster » !

Déi staark Ausdréck bezéien sech natierlech net op d'Hauptacteuren, ouni déi et iwwerhaupt kee Football-Mundial géif ginn. Viséiert sinn also wuelverstanen net d'Spiller !

Mee eng laang Rëtsch vu korrupte Gestalten an hir Daachorganisatioun FIFA, verkierpert duerch hiren onméiglechen Boss Sepp Blatter...

Datt dës Woch, bei Geleeënheet vum FIFA-Kongress zu Zürich d'schwäizer Justiz, op Demande vun hiren amerikanesche Kollegen gläich eng gutt hallef Dosen deeër Pseudo-Fonctionnaren vum gréisste Sportverband op der Welt verhaft hunn, an d'FIFA (déi jo soss ëmmer gären all Virwërf erofgespillt huet) selwer net méi derlaanscht koom, eng geschloen Dosen vun hiren Exekutivmemberen ze suspendéieren, ass natierlech weltwäit als de gréisste Skandal ëmfonnt ginn, deen et jeemools gouf, net nëmmen am Football, mee an der ganzer Sportgeschichte iwwerhaupt !

An trotzdem...

Datt et eemol zu deem ausseruerdentlechen Theatercoup kéim, hong scho méi laang an der Loft.

Zënter Januar 2014, zënter annerhalwem Joer also schonn, huet ë.a. de franséische Wochemagazin « France Football », Woch fir Woch, eng bis an de leschten Detail a mat enger Onmass vu Dokumenter beluechten Enquête publizéiert, déi sech op eng ganz seelen, op eng eenzegaarteg Aart a Weis mat de Korruptiounsvirwërf am Zesammenhank mat den WM-Organisatiounen 2018 a Russland an 2022 am Qatar beschäftegt huet. Déi Revelatiounen iwwer kolossal Machenschaften vun enger Rei héige FIFA-Fonctionnaren bei der Ofstëmmung den 2. Dezember 2010 am FIFA-Exekutivcomité hu sech mat der Zäit gelies wéi dem Stig Larsson seng faméis « Millennium Trilogie » : mat gellecher Leidenschaft an onwahrscheinlecher Spannung ! Déi iwweraus recherchéiert kritesch Analysen vun de franséische Journalisten waren ëmsou méi bemierkenswäert well zënter e puer Joer « France Football » sech mat der...FIFA associéiert huet fir d'Organisatioun vum « Ballon

d'Or », déi jorzéngte laang d'Visitekaart vum spezialiséierte fransésische Footballmagazin war.

Kuerz : ween sech fir d'Problematik vun de geplangte Weltmeeschterschaften 2018 an 2022 och nëmmen e bësschen intresséiert huet, konnt net ausschléissen, datt an deeër Fro fréi oder spéit eng Kéier en Tsunami iwwer d'FIFA erabrieche géif. De Weltverband selwer hat jo, fir de Schäin alt e bësschen z'erhalen, e renomméierten fréieren amerikaneschen Procureur, de Michael Garcia, chargéiert eng onofhängeg Enquête ze maachen, iwer d'Konditiounen ënnert deenen d'Memberen vum FIFA-Exekutivcomité Russland resp.de Qatar designéiert haten. Dem Garcia säi Rapport muss allerdéngs esouvill Sprengstoff enthalen hunn, datt déi Häre Verantwortlecher vun der FIFA refuséiert hunn e ganz ze publizéieren. Wouriwwer den Auteur natierlech stacksauer war.

Déi Episode, a wuel och d'Tatsaach, datt d'USA och Kandidat fir d'WM 2022 waren, gehéiere sécher zum Hannergrond, datt ausgerechent d'amerikanesch Justiz (an Zesummenaarbecht mat der US-Steierverwaltung) eng Partie Bonze vun der FIFA wéinst Korruptioun vu Milliounen Dollar, Blanchiment an aner Gaunerieie verhafte gelooss huet, dorënner zwéin aktuell an zwéi fréier Vizepresidenten vun der FIFA, déi iwwregens un den ernimmten Ofstëmmungen den 2.Dezember 2010 zu Gonschte vu Russland a Qatar deelgeholl haten.

Vläicht nach méi spektakulär wéi d'Interventioun vun der amerikanescher Justiz de 27.Mee elo, war d'Nouvelle deeselwechten Dag, datt d'schwäizer Justiz, déi bis elo x-mol an aneren Affairen géint d'FIFA an hiren omnipotente President Blatter éischer passiv bliwwen war, schonn den 10.Mäerz dëst Joer eng Prozedur ageleet huet wéinst den Korruptiounsverdächtigungen a Saachen WM-2018 an 2022 !!!

D'FIFA an hire Superboss Blatter, deen zënter 40 Joer d'Ficellen zitt, vun 1998 un als President, nodeems e virdrun laang Zäit, vun 1981 bis 1998 als Generalsecrétaire fonctionnéiert hat, deemools ënnert der Presidentschaft vum brasilianeschen Bestiechungsspezialist Joao Havelange (deen 2013 nodreeglech als Eirepresident wéinst all sengen erwisene Skandalen huet missen demissionéieren) ,...

d'FIFA an den Här Blatter also weisen no albewäerter Manéier alles zréck ; jo, si fillen sech souguer als Affer an deem ganze Skandal.

't ass wouer, datt an deenen gutt 160 Säiten vun hirem Rapport, d'US-Justiz den Numm Blatter(bis elo) nach net ernimmt huet. E sollt sech allerdéngs a sengem aussergewéinlechen Zynismus net ze fréi freen, och wann en (geschter den 29.Mee) nach eng Kéier (dës Kéier awer net méi sou souverän wéi soss ëmmer) zréck gewielt gouf.

Well d'amerikanesch Justiz huet nach en Tromp an der Hand : e Personnaasch, deen dem Blatter net wäit aus de Féiss geet : den Chuck Blazer, Ex-President vun der amerikanescher Federatioun a fréiere President vum CONCACAF (Confederatioun vun Nord an Zentralamerika resp.de Caraiben) wat d'Korruptiounsfaschicht par excellence an der FIFA-Struktur ass. Dee

Blazer , dee mat alle Wässerche gewäsch ass, dee selwer eng Tonn Dreck mat sech schleeft, collaboréiert nämlech mat der amerikescher Justiz, an dee weess allerhand iwwer den Här Blatter ze verzielen.

Et wier jo och witzeg, wann dee Mann, deen zënter 40 Joer d'FIFA wéi seng sakrosankt Proprietéit am Grëff hat, an engem Mooss, datt jorzéngtelaang vum Blatter-System geschwat gouf, net am Bild gewiescht wier, wat an all deeër Zäit seng Presidenten a Vizepresidenten (Havelange, Warner, Webb a Cie) alles verbrach hunn.

A wann de Schwäizer Sepp elo no senger neitster Wiel héich an helleg versprach huet, déi nächst véier Joer alles ze maachen, fir d'Glawwierdegkeet vun der FIFA nees ze reetabléieren, da musse een haart laachen : well 40 Joer laang war hien den Haaptschëllegen, datt déi Credibilitéit futti gemaach gouf !

Et bleiwen e puer lescht Iwwerleeungen...

Wann ee weess, watfir eng Roll eng Partie vun deene sougenannten internationale Footballdirigenten am CIO, dem internationalen olympesche Comité gespillt hunn, da muss een sech voller Suerg froen, a waat fir engem Mooss si do hiert Onwiese gedriwwen hunn. Korruptioun ass jo nämlech och un deem Gremium e Begrëff deen een ëmmer an alle Forme conjugéiere konnt...

Mee fir op de Fall vun der FIFA zrëckzekommen, bleift ofze waarden, ob jeemools richteg erauskënnt, watfir eng Roll de Michel Platini an deeër ganzer Saach gespillt huet. De gottgeseente Footballer (ee vun de beschten vun allen Zäiten hanneru Messi, Pelé, Maradona, Cruyff), deen an de leschte Joren als UEFA-President opgaangen ass wéi Deeg, war emol (1998, wéi de Blatter fir d'éischt als President kandidéiert huet) säin enkste Mataarbechter. Déi lescht Wochen ass en als säi gréisste Kritiker opgetrueden ; hat allerdéngs net de Courage selwer géint hien als Kandidat unzetrieden, an huet déi lescht Deeg, wéi d'Crise elo voll ausgebrach ass, d'Pedalle verluer : Säin Opruff un der UEFA hir national Verbänn, fir de Prënz Ali ze stëmmen, hat net dee gewënschten Erfolleg : souguer dem Platini seng franséisch Federatioun huet fir de Blatter gestëmmt !

A wann een dann och nach weess, datt de Platini (aus Naivitéit, aus Strategie oder aus perséinlechem Intressi... ?) fir de Qatar 2022 gestëmmt huet, da kommen esouvill Elementer zesummen, datt een dorausser net méi schlau gött...

An de FIFA-Skandal aus lëtzebuerger Siicht ? Vum FLF Chef Pol Philipp waren déi lescht Deeg allerhand Saachen ze liesen an absëns (op senger léifster Statioun) ze héieren. Loosst eis ganz léif sinn a just nëmme mengen, datt nach laang net alles konsequent war, wat do op d'Tapéit koum.

Well eppes ass sécher : wann den Här Blatter sou laang Mëschts maache konnt, dann ass et well en ëmmer vun deenen 209 Federatiounen majoritär oder bal eestëmmege gewielt gouf.

Aus evidente Grënn : wee gutt schmiert, wee gutt fiert. De FIFA Boss huet sech an alle Länner vun der Welt ëmmer de schéine Männche gemaach. Och hei zu Lëtzebuerg. D'FLF huet Joer fir Joer Honnertausenden Euro vu Subsiden agesäckelt. An dat ass, mat Ausnam vum 29.Mee 2015, ëmmer honoréiert ginn.

Wann de FIFA-Boss sech esou laang ongestrooft hale konnt, dann ass dat grad esouvill d'Schold vun der FLF wéi vun deenen aneren nationale Verbänn. De Géigendeel ze behaupten wier pur Hypocrisie !

pilo fonck